

Pablo Colosas Anoafu Kirika Kenexō Fomani

*Pablo Jesús Ifofaafo kirika kenexō fomani,
Colosas anoafu*

1-2 Ēkīa Pablo, Niospa ea nīchini, aato apaiyai keskafakī ē yorafo yoinō Jesucristoōnoa. Nofe yora Timoteo feta nō mato kirika kenexō fomai. Mā Cristo Ifofakōikē, pexe rasi Colosas anoxō Nios nikakōiyanā. Nōko Epa Niospa mato noikī mato shināfafāinō afanā mato fekaxtefanōma mā isharakōinō.

Pablo a Jesús Ifofaafo ato kīfixōfafāini

3-4 Nā nōko Ifo Jesucristo āfe Apa Nios nō mato kīfixōfafāini. Nō mato kīfikī iskafaxokī aicho fakī māmāi nō nikax mā Cristo Jesús Ifofakōikē. Nāskaxō nā Jesús Ifofaa fetsafori mā ato noikōimiskē mā nō nikamis. ⁵ Na meka shara chanīmakōi Jesucristoōnoa mā mā nikamis. Jesucristo chanīmara faax Nios ika ari mā afe ipaxatiro ixō yoinifo mā mā nikamis. Na meka chanīmara fakōixō fetsafo mā ato noikōimis. ⁶ Na meka shara Jesucristoōnoa mā nikakī taefakī mā chanīmara fakī finakōini. Nāskaxō nikakī mā tāpini chanīmakōi, Niospa mato noikī Jesucristoōxō mātō chaka mato soaxoni mā chanīmara faino. Nāskakē na meka shara, nikakani maifo tii anoafori nāskarifiamisfo. ⁷ Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāato Jesucristoōnoa mato yoipaoni. ⁸ Nā Ipafras matoōnoa iskafakī

noko yoiaito nō nikamis: “Na Colosas anoafo Niospa Yōshi Sharaōnoax isharakōikaxō fetsafo noikōikani,” ixō noko yoiaito nō nikamis.

⁹ Nāskakē nā ē matoōnoa nikakī taefanitīa, ē mato Epa Nios kīfixokī xatemisma. Kīfikī ē iskafa fafāfāini: “Epa Niospa, Colosas anoafo mī Yōshi Sharaōxō mī ato amapaiyai keskakakī ato tāpimafe, mī ato tāpimanai keskakakī āto ōiti mēraxō mia tāpikaxō mia Ifokōi fanōfo,” ixō ē mato kīfixōfafāini.

¹⁰ Nāskaxō nā mato amapaiyai keskara mā akaino ōi Nios matoki inimakōixii. Nāskax āfe Fake keskarakōi mā itiro. Nāskaxō mā fetsafo sharafa fafāfāikī mā Nios tāpiki finakōitiro. ¹¹ Akka Epa Niospa afama mīshtifo shara fatiroki, āfe kerex shara mitsisipakōi mato inātiro afara afeskarafaino aōxō mā tenekōinō. Nāskafikī mā tenetiro fena fenakīma inimasharakōikai. ¹² Nāskakē mā inimakōi. “Aicho Epa Niospa,” mā fatiro nāatomāi noko imasharata afe yorafo ināpaiyai keskakakī nokorimāi ināito. Nōri afe yorafokē noko inimamaxii, a ika anokai fakishma penasharakōi.

¹³ Nāskakē noko imasharakōia anā fakish mēra nō inōma. Akka nā Satanās ika ano fakishifākōi. Nānoa Epa Niospa noko ifia, āfe Fake fe nō ipaxanō. Nāato āfe Fake noikōi. ¹⁴ Āfe Fāke noko nāxonikē aōxō Epa Niospa noko ifia, nōko chaka noko soaxoyanā.

Jesús noko nāxonioānoax Nios fe nō isharapakenaka

¹⁵ Akka nō Epa Nios ōiyamafitirono āfe Fake Jesús mai ano oni. Nāskaxō āfe Fāke noko tāpimani afe keskaramākī Apa Nios. Nā āfe Fake Jesús Apa Nios keskarakōi, āfe ōiti keskarakōiri. Afaa oniataima

Apa Nios fe nai mēra iyopaoni. ¹⁶ Āfe Fake Jesucristoōxō Niospa keyokōi onifani, nai mēranoafoya nono mai anofo. Nā nō ōitiromafoya, a nō ōitirofo onifani. Askatari āfe ājirifo nā afe ikafo onifata, niafakafāferi āto xanīfori onifani. Epa Niospa āfe Fake Jesucristoōxō keyokōi onifani. ¹⁷ Afaa oniataima Cristo iyopaoni. Āfe kerex sharaōxō keyokōi kexesharakōimis. Nāskaxō fishifo kexeta, xini kexeta, oxe kexeta, nōko mai kexeta famis. Akka nāfo kexeyamaino, chakanai fetsekerana. Nai fe mairi chakanakerana. ¹⁸ Tsōakai Jesús finōtiroma, afaa oniataima keyokōi finōyopaonixakī, iskaratīari keyokōi finōa. Nāfi nā chanīmara faafāfe āto Ifokōiki. ¹⁹ Nāskaxō Epa Niospa yoikī iskafani: “Ē imis keskai ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. ²⁰ Jesús ifi cruz ikaki mastaifono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anofoya nai mēranofo afe isharatirofo.

²¹ Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. ²² Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiroma. Nāskaxori mā yoitiroma iskafakī: “Mī afara chakafamis,” ixō aōnoa mā afaa yoitiroma. ²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa

Niospa matoõnoa yoipakenakama iskafakĩ: “Mĩ afara chakafamis,” ixõ matoõnoa afaa yoipakenakama. Askatamaroko mã chanĩmara faax mã inimakõiaito mato ifixii mã afe ipaxanõ. Mã Jesucristo ãfe meka shara nikakĩ taefani keskafakĩ nãnorikõĩ keyokõĩ ẽ ato tãpimani. Ẽkĩa Pablo, ẽ Epa Niospa ãfe meka yoifafãini Jesucristoõnoa ato yoikĩ.

Niospa Pablo yoini a Jesús chanĩmara faafo ato yonoxonõ

²⁴ Nãskakẽ ẽ inimai ẽ matoõnoax omiskõifi, mãri afara afeskaraino mã Cristo Ifosharakõĩ faano. Cristo nokoõnoax omiskõini keskai, ẽri nã afe rafemisfoõnoax nã Niospa fakefo atoõnoax ẽ omiskõimis. Ẽ matoõnoax omiskõita iskaratĩari ẽ Cristoõnoax omiskõimis. ²⁵ Akka Epa Niospa ea katonĩ, a mato yonoxomis keskara ẽ inõ, ãfe meka shara ẽ mato yoinõ. Nãskaxõ ea yoikĩ iskafani: “Na maniafo tii anoa ẽfe meka shara Jesucristoõnoa ato yoifofãsafafe,” ixõ ea yoini. Nãskaxõ ãfe kaifoma mẽra ea nĩchini. ²⁶ Na meka shara Jesucristoõnoa nõko xinifãfe tãpiyopaonifoma. Niospa ato tãpimayopaonima. Akka iskaratĩa Niospa noko tãpimani nõ afe yorafokẽ. ²⁷ Epa Niospa Cristoõnoa mato yoiyomis keskafakĩ keyokõĩ mato tãpimaxii, mato fisti tãpimatama, nã yora fetsafori ato tãpimaxii. Iskafakĩ ato yoixii: “Ẽfe Fake Cristo mato fe rafekakãini, nãskakẽ mã chanĩmara fatiro a ẽ ika ano efe ipaxakĩ. Nã Cristo isharakõiai keskafakĩ ẽri mato askafatiro mãri isharakõinõ,” ixõ mato yoini.

²⁸ Nõ Cristoõnoa yoimis, keyokõĩ nõ ato yoifofãsafamis keyokõĩ nõ ato yoimis nikakõinõfo.

Mã isharakõiano nõ keyokõi Niospa ferotaifi nõ õimasharapai a keskara shara ixii. ²⁹Nāskakē ē mato yonoxokī finakõifafāini, Cristo āfe kerex shara ea ināno.

2

¹ Akka ē mato yoipai mã tãpinõ, ē mato Epa Nios kīfixõfafāini. Laodicea anoafu yafi fetsafori a ea õimisfoma nãfori ē ato Epa Nios kīfixõfafāini. ² Nāskaxõ ē mato kīfixõfafāini mātõ õiti mēranoax mã inimakõiyana, mã ranã mã nõinākõinõ. Nāska faatanãxõ Epa Niosnoa xafakīakõi mã tãpitiro, akka a iyopaonifāfe Cristoõnoa tsõa tãpiyopaonima. Nāskakē iskaratīa xafakīakõi mato tãpimapai aõnoa mã tãpisharakõinõ. ³ Nãato keyokõi tãpikõia, Apa Niospa tãpia keskafakī āfe shinã mēraxori tãpikõia. Akka Epa Nios afarafo sharafoyakē, Cristoõxõ mã tãpitiro. ⁴ Nãnori ē mato yoi, tsõa mato pārayamanõ, meka fetsafaxõ fanīrira mato yoipaikani kiki. ⁵ Ë mato fe iyamafaxõ pena tii ē mato shināi. Akka matoõnoa nikai ē inimakõi, mã chanīmara fakõixõ mã Cristo nikakõiaito.

Jesucristo nõko õiti fetsafaxõfaano a keskara shara nõ inõ

⁶ Nāskakē mã nõko Ifo Jesucristo chanīmara fakõixõ, mã Ifofakõina. Nāskakē pena tii afe rafefafāikāfe. ⁷ Oa afara fanafono āfe tapo mai mēra chaikõi kaax feroitiroma keskara, Jesúsri nāskarakõikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakõikī Jesús chanīmara fafafaikāfe. Nāskaxõ pena tii Epa Nios aichofa fafafaikāfe.

⁸ Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakekōifiax Apa Nios imis keskara nā nāskakōini. ¹⁰ Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfofāna. Nāskakē mā Jesús fe rafexō mā afaa fetsa yopaima. ¹¹ Askatari mā Cristo Ifofai akka feronāfakefāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono mātō chaka mato soaxotiroma. Cristo fistichi mātō ōiti mato fetsafaxotiro, mātō chaka mato soaxotiro afianā a mā chaka apaoni keskara mā anā atama a keskara shara mā inō. ¹² Akka mā maotisai faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarafo. Mā faka mēra iki maotisameax mā fininākafāni oa Jesús fe fininākafani shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. ¹³ Mā Jesús Ifofaamax nā yora naa keskara mā iyopaoni. Nāskaxō mā afara chakafapaoni mātō chaka xatexoma. Nāskafikē Epa Niospa Cristo otofani afe nipaxanō. Nāskarifiakī matorī aōxō nimapakexatiro, nāskaxō nōko chakafo

mã noko soaxona. ¹⁴ Shinãkapo. Keyokõi nõ chakafamis keskara nõko chakafo Epa Niospa noko soaxoni, anã afoõnoa shinãyamaxii. Nãskano Niospa yoini keskara nõ nikatama afara fetsa nõ chakafapaoni. Nãfo keyokõi nõ chakafamisfo keskara kenepakea. Askafixõ ifi cruz ikakinoa Jesús mastanifoxõ não nõko chaka noko soaxoni. ¹⁵ Akka Cristo ifi cruz ikakinoax noko nãxonixakĩ, Satanás yafi keyokõi niafaka chakafo finõkõia. Nãskakẽ noko anã afeskafatiroma, anã nõko ifo ixõ noko ìkitirofoma. Nãskakẽ Jesús ifi cruz ikakinoax naino Niospa keyokõi maifo tii anoafoto ato ispani na niafaka chakafo anã kerexfoma.

Jesús ika ari nai mēra sharakõi nã fisti fichipaikāfe

¹⁶ Akka mātō xinifāfe āto feyafati ipaoni xinia fena ikaino fista apaonifo. Askatari oxe rama kãiyaino fista apaonifo. Akka mato yoitirofo iskafakakĩ: “Afaa mã pitiroma askatari afaari mã ayatiroma. Askatari nõko pena tenetitĩa mãri tenetiro,” ixõ mato yoitirofo. Akka mã askayamaino fetsafāfe mato mekafakĩ ìchatirofo. Mato askafaifono ato nikayamakāfe. ¹⁷ Akka nã mātō xinifāfe āto feyafati noko õimatirofo afe keskara iximākai a Cristo oaino. Akka mã Cristo oano nã fisti nõ Ifofatiro. Nã nõ feyafamis keskara nõ anã atiroma. Cristo fisti nõ nikatiro a nõ ayopaoni keskara nõ anã axikima. ¹⁸ Õisharakāfe fetsafāfe mato pãrapaikani kiki iskafakakĩ: “Nõ afaa tãpiama. Ājirifo nõ kĩfitiro,” ixõ mato pãrapaikani. Afāfe afaa õiyamafikatsaxakakĩ afama mĩshtifo yoipaimisfo. Āto shināmã shinākata kakapaikõimisfo,

Niospa shināi keskarakai shināmisfoma. ¹⁹ Afokai Cristo fe rafepaikanima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, ſafeskakī mā ato nikaimē, mā ato nikaxō nā mato yoiaifo keskara ma apai? Nāskakē ato nikayamakāfe. ²¹ Nāskakē mato yoiki iskafapaikani: “Na afarafo meyamakāfe, afori piyamakāfe, mato ināifonori mātō mēkemā achiyamakāfe,” ixō mato yoipaikani. ²² Akka na mato yoipaiyaifo keskara Niospa anori ato yoiama. Āa shinākaxō mato yoipaikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe. ²³ Chanīma, yora fetsafāfe shinākī iskafakani. Na ato yoiaifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifafāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafo sharakōifo,” ixō atoōnoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anã otoiñakafani keskai mări năskariai afe otoiñakafani keskara mări itiro mări isharakōiax afe ipaxakī. Cristo iskaratīa Apa Nios fe ika afeta keyokōi ikinā. Năskakē aōnoa shināta nă mato amapaiyai keskara aōnoa shināfafāikāfe.

² Năskakē nă Niospa fichipaiyai keskara fisti shinākāfe, năskakōixikakī. Akka nono mai anoxō yorafāfe afara chakafapaiyaifo keskafakī mări askafayamakāfe. ³ Anã ē mato yoi Cristo noko năxoni. Akka mări oa Cristo fe naa keskara iyonī, năskakē iskaratīa mări afe rafekakaini, Epa Nios feri mări askakakāini. Năskariai Epa Niosri mato fe rafekakaini. Mări askaito tsōa mato tāpitiroma, a mări Cristo fe rafeai keskai ari askaxiki. ⁴ Cristo anã mai ano fotofaino mări afe ixii. Năato noko ikipakenaka. Năskakē a keskara sharakōi nōri afe ixii, keyokōichi yorafāfe noko ōixikani.

Nō chaka iyopaonixakī iskaratīa nō ōiti fena sharayakōi

⁵ Năskakē a mări afarafo chakafapaoni keskafakī anã askafayamakāfe. Askarafo anã shināyamakāfe. Askatari mărito āfimafori chotayamakāfe, kērofāferi mărito fenemafori chotamayamakāfe. Năskaxō ato chaka shināmayamakāfe. Afarafori noiyamakāfe feronāfakefāfe mărito āfima fichipaiyamakāfe, kērofāferi mărito fenemafo fichipaiyamakāfe. Afara chakafori fichipaiyamakāfe, nări mări fichipaiyai fisti fichipaiyamakāfe. Mări askakī Nios mări noima, nări afarafo fisti noikī. ⁶ Askara chakafo Niospa ōipaima, năskakē ato omiskōimakī finakōixii nikayamaifono. ⁷ Năskakē taeyoi chakakōi mări

iyopaoni Nios nikamax. ⁸ Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato īchayamakāfe, askatari mātō axfapa meka chaka yoiyamakāfe. ⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. ¹⁰ A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa mātō ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. ¹¹ Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa mato noikī mato katonī afe yorafo mā inō. Aa keskara shara mato imaxiki. Nāskakē fetsafo noikī ato sharafa fafafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaifo keskarari shinākāfe, oi tsii faxō ato yoifafāikāfe. ¹³ Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe mato raefa keskafakī fetsafo fe raenā faatanāsharakāfe. ¹⁴ Nāskakē nā ē mato yoiāi keskai, keyokōi noinākāfe, nō noināsharafinakōiaki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. ¹⁵ Nāskakē Cristo nikasharakōikāfe mātō ōiti sharanokai mā fochishpanā faatanātiroma. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katonī aōnoax mā

isharakõita fetsafo mā afeska fanõma. Nāskakē mā Epa Nios yoitiro iskafakī: “Aicho Epa Niosi, ēfe õiti mña sharafoxõa,” ixõ mā yoitiro.

¹⁶ Cristo noko tãpimani keskafakī mñto õiti mēra nanekõikāfe. Nñato mato ìkinākī āfe meka tãpisharakõixõ fetsafori yoisharakāfe isharaxikakī. Mñto õiti mēraxõ Nios aicho fata David fanāini keskai mñri fanāixota āfe mekaõnoari fanāixokāfe. ¹⁷ Nāskaxõ nã mā apaiyai keskafakī yoikāfe iskafakī: “Aicho, Epa Niosi. Nõko Ifo Jesucristoõxõ nã nõ apaiyai keskafakī keyokõi mñ noko axõfafāimis,” ixõ yoifafāikāfe.

Nõ Jesús Ifofakõinax aõnoa nõ afeskatiromāki

¹⁸ Kērofāfe, mñto fenefāfe mato yoiāifāfe ato nikasharakõikāfe. Nāskax mā isharakõikai nõko Ifāfe mato yoiāi keskai. ¹⁹ Feronāfakefāfe, mñto āfiffo noikõikāfe ato fe feratenāyamakāfe.

²⁰ Fakefāfe, mñto epa yafi mñto efa nikakõikāfe. Mñ askaino nõko Ifo matoki inimakõi kiki. ²¹ Epafo feta efafāfe, mñto fakefo ferateyamakāfe, mñto fakefāfe shinākī iskafayamanõfo: “Ooa, ēfe epa feta ēfe efa ea feratenafo,” ixõ shināyamanõfo.

²² Āto yonomatifāfe, mñto ifofo ato nikakõikāfe nono mai anoxõ. Akka mato õiaifonos ato yonox-okakīma, mato õiamaifonori ato yonoxokāfe. Nã mñto Ifo Jesucristo mā noiaino, matoki inimanõ ato yonoxosharakāfe. ²³ Afara yonokī inimayanã axosharakõikāfe. Nõko Ifo shinākī ato yonox-osharakāfe. ²⁴ Nāskakē shināmakiyamakāfe mā mā tãpiaki nõko Ifo chipo afara sharafo mato ināxii kiki. Mñ nõko Ifo Jesucristo yonoxosharamiski, nñfi mñto Ifokõikī. ²⁵ Akka nã afara chakafamisfo,

nãfo omiskõi finakõixikani afara chakafakatsax-
akakĩ. Nãskakẽ Niospa fetsa keskarafo noko õima,
nãskarafo noko õi.

4

¹ Ato yonomamisfãfe, mãto yonomatifo ato
paraxõ yonokakĩma ato noisharayanã afara
sharafo ato inãsharakãfe ato parakakĩma. Mã mã
tãpiakĩ mãri Ifoyakĩ, mãto Ifãfe nai mëraxõ mato
õifafaini kiki.

² Nãskakẽ Epa Nios kĩfiki xateyamakãfe,
kĩfikĩ afara fetsa shinãkakĩma, Epa Nios fisti
kĩfikĩ iskafakãfe: “Aicho Epa Niosi, mĩ ea
sharafa fafafãini,” ixõ kĩfikãfe. ³ Nãskakẽ nokori
kĩfixokãfe, Epa Niospa fetsafo mëra noko nĩchiano
Cristoõnoa nõ ato yoisharanõ. Afãfe Cristoõnoa
nikamismomaki. Akka ã Cristoõnoa meka shara
yoiuito yorafãfe ea karaxa mëra ikimanifo. ⁴ Ea
Epa Nios kĩfixõfafãikãfe xafakĩakõi Jesucristoõnoa
anã ã ato yoinõ.

⁵ Akka nã Jesús Ifofaafoma mëra mã ikaki ato
õimakãfe mã isharakõixõ. Nãskaxõ nã mã atoki
nokoaitĩa Jesucristoõnoa ato yoisharakãfe. ⁶ ato
fe mekakĩ meka shara fisti ato yoifafãikãfe, ato
kaxemetsama fakakĩma ato yoisharakõikãfe, ãto
õiti mëraxõ shinãchakanõfoma. Mã askakĩ nã yorafo
mã ato kexesharatiro.

*Pablo mã mekai xatekĩ Colosas anoafõ ato meka
shara fomani*

⁷ Nofe yora Tíquico, ã aõ noikõi. Nãato efeta nõko
Ifo Jesús yonoxomis. Nãskakẽ aato eõnoa mato yoi
kiki ã afeskax nono ikamãkĩ. ⁸ Nãskakẽ ã mato ari
nĩchia, aato mato yoinõ afeskax nono nõ ikamãkĩ,
askatari mato inimamasharakõixiki. ⁹ Nã nofe

yora Onĩsimõri afe kai, nãri ã noikõĩ. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

¹⁰ Akka na efe karaxa mẽra imisto Aristarcori mato meka shara fomai. Marcosri mato meka shara fomai, nã Marcos Bernabé ãfe chai. Nãskakẽ nã Marcos matoki nokoaito ã mato yoia keskafakĩ ifisharakãfe kexesharayanã. ¹¹ Na feronãfake ãfe ane Jesús nãatori mato meka shara fomai, ãfe ane fetsa Justo. Nãfãfe judeofo mẽraxõ Nios Ifokõĩ fakaxõ efeta Nios xanĩfoõnoa yoikĩ yonomisfo. Nãskafakakĩ ea inimamakõimisfo. Akka ãfe kaifãfe nonoxõ efeta Nios yonoxomisfoma, nã ã mato yoiaifo feta ã Niosnoa yoimis. ¹² Na feronãfake Ipafrasri meka shara mato fomai, nãatori Cristo yonoxomis, nã mato mẽra iyopaoni. Nãato mẽxotaima matoõxõ Epa Nios kĩfikĩ iskafa fafafaĩni: “Epa Niosi, mĩ ato amapaiyai keskafakĩ ato amafe afaa fetsa shinãnõfoma. Nãskakanax mĩ Fake Jesús õiti keskara shara inõfo,” ixõ mato kĩfixõfafãini. ¹³ Akka mẽ õia na Ipafras matoõxõ shinãchakakõiaito. Askatari nã peixe rasi Laodicea anoafu yafi Hierápolis anoafu ato Epa Nios kĩfixõfafãini. ¹⁴ Na Lucas ato sharafamis, ã aõ noikõĩ. Nãato Demãs feta mato meka fomakani.

¹⁵ A Jesús Ifofaafu Laodicea anoafu ea ato yoisharaxõfe. Nĩnfasri ea yoisharaxõfe, a ãfe peixe anoax Nios Ifofakanax ichanãmisfori ea ato yoisharaxõfe. ¹⁶ Akka na kirika kene ã mato fomai mã mã õixõ, nã Nios Ifofaafu Laodicea anoafu ato fomakãfe akairi õinõfo. Mãri na kirika kene õikãfe Laodicea anoxõ mato mana manafono. ¹⁷ Nãskakẽ Arquipori ea yoikĩ iskafaxokãfe: “Epa

Niospa mia yoia keskafakĩ axosharakõife,” ixõ ea yoisharaxokãfe.

¹⁸ Ëkĩa Pablo, ã mato kirika kenexoni. Mato yoisharakĩ, ãfe mifikõichi ã kenei. Nãskakẽ ea shinãmakiyamakãfe ã karaxa mẽraxõ ikakĩ. Niospa mato noikĩ matoõnoa shinãfafãinõ. Nã tii.

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc